

یوہ آکاشوانی جموں بے نصرت چوہدری تے ظفر اقبال تیں خبر سُنو۔

\*\*\*\*\*

## HEADLINES

۱. جموں کشمیر حکومت نے بکھ بکھ اسناد تے زمین تیں متعلق ریکارڈ جاری کرن واسطے نوی فیس غو شیڈیول جاری کیو ہے۔ ڈومیسائل تے جنرل کاسٹ سرٹیفکیٹ بغیر کسی فیس غے جاری کیا جنیں گا۔ تے جائیداد غا اندراج واسطے، خواتین نابہ 3 فی صد تے مرداں نابہ 7 فی صد اسٹیمپ ڈیوٹی دینی وے گی۔

۲. لیفٹیننٹ گورنر منوج سنہا نے اج جموں مانہ بہگوان پرشورام جی غا جنم تہاڑا گا موقع ور ایک شاندار شوبھا یاترا نانہ چھنڈی دس غے روانہ کیو۔

۳. اج کئی اراکین اسمبلی، وفود تے افراد نے وزیر اعلیٰ عمر عبداللہ تیں ملاقات کی تے اپنا مسائل اُن غے سامنے پیش کیا۔

۴. جل جیون مشن غی عمل آوری گو جائیزو لین واسطے بنائی گئی ہاؤس کمیٹی نے اج پونچھ ضلع مانہ بکھ بکھ پانی غی سپلائی بارے سکیمان گو زمینی معائنو کیو۔

۵. جموں شہر مانہ توی ریور فرنٹ، مقامی لوکاں تے سیاحاں واسطے ایک ہلچل آلی منزل مانہ تبدیل ہو گئی ہے۔

\*\*\*\*\*

## FEE CERTIFICATES

جموں کشمیر حکومت نے بکھ بکھ اسناد تے زمین تیں متعلق ریکارڈ جاری کرن واسطے نوی فیس غو شیڈیول جاری کیو ہے۔ آکاشوانی جموں غا نمائندہ غے مطابق، نوا شیڈیول غے تحت ڈومیسائل تے ذات بارے اسناد مفت جاری کیا جنیں غا، جد کہ دیگر دستاویزات ور معمولی فیس لی جے غی۔ سرکاری حکم غے مطابق، ڈومیسائل سرٹیفکیٹ، کردار سرٹیفکیٹ، زرعی سرٹیفکیٹ، مزہب غو سرٹیفکیٹ، نوا ادھار اندراج تے پنج سال توڑی لازمی بايو میٹرک ایڈیٹ تے جنرل کاسٹ سرٹیفکیٹ بغیر کسی فیس غے جاری کیا جنیں گا۔ زمین غا اندراج واسطے حکومت نے خواتین واسطے 3 فی صد اسٹیمپ ڈیوٹی تے مرداں واسطے 7 فی صد مقرر کی ہے، اس تیں علاوہ 10 فی صد اندراج بارے فیس لاگو وے غی۔

\*\*\*\*\*

## LG SHOBHA YATRA

لیفٹیننٹ گورنر منوج سنہا نے اج جموں گا چانکیہ چوک پریڈ تیں بہگوان پرشورام جی غا جنم تہاڑا گا موقع ور ایک شاندار شوبھا یاترا نانہ چھنڈی دس غے روانہ کیو۔ یوہ جلوس ڈوگرہ برہمن پرتی ندھی سپھا غی جانب تیں کٹیو گیو تھو، جس مانہ بہگوان پرشورام غی زندگی تے تعلیمات نانہ خراج عقیدت پیش کیو گیو۔ جہڑا بہگوان وشنو غا 6 واں اوتار منیا جیں۔ اس تیں پہلاں لیفٹیننٹ گورنر نے بہگوان پرشورام غے اگے حاضری دتی، تے اُنہاں نے سب واسطے امن، ترقی تے خوشحالی غی دُعا کی۔ اس موقع ور، ایم ایل اے یوددھویر سیٹھی، دیویانی رانا، اعلیٰ افسراں تے معزز شہری وی موجود تھا۔

\*\*\*\*\*

## CM DELEGATIONS

اج کئی اراکین اسمبلی، وفود تے افراد نے وزیر اعلیٰ عمر عبداللہ تیں ملاقات کی تے اپنا مسائل اُن غے سامنے پیش کیا۔ سابق وزیر تے رکن اسمبلی عبدالمجید وانی، تے سابق رکن اسمبلی چمن لال نے اپنا اپنا علاقہ تیں متعلق اہم مسائل نانہ اُجاگر کیو۔ انڈین انسٹی ٹیوٹ آف آرکیٹیکٹس جموں کشمیر چیئر غا ایک وفد نے جس غی قیادت چئیرمین وکاس دوبے کر رہیا تھا، اُنہاں نے عمارتاں غا نوا قوانین مانہ حالیہ تبدیلی تیں پیدا ہون آلا مسائل گا بارا مانہ وزیر اعلیٰ نانہ آگاہ کیو۔ اسی دوران جموں یونیورسٹی ٹیچرز ایسوسی ایشن غا صدر پروفیسر رویندر سنگھ غی قیادت مانہ ایک وفد نے اساتذہ تیں متعلق مسائل پیش کیا۔ وزیر اعلیٰ نے تمام وفود تے افراد غی گل غور نال سُنی تے یقین دہانی کرائی کہ جائیز مسائل نانہ ترجیحی بُنیاد ور حل کیو جے غو۔

\*\*\*\*\*

## HAJ FLIGHTS

جموں کشمیر حج کمیٹی نے اعلان کیو ہے کہ 2026 واسطے سرینگر تیں حج پرواز 18 اپریل تیں شروع وے گی۔ آکاشوانی جموں گا نمائندہ غے مطابق، پہلے تہاڑے 3 پرواز روانہ وین غی۔ تمام عازمین نانہ ہدایت دتی گئی ہے کہ وہ اپنا مقررہ وقت غے مطابق، حج ہاؤس بمنہ سرینگر مانہ رپوٹ کریں۔ کمیٹی نے کہیو ہے کہ تمام لوک مقررہ وقت تے سامان غا اصولاں ور عمل کریں تانجے روانگی غو عمل آسانی نال مکمل کیو جاسکے۔ اس سال جموں کشمیر تیں 4 ہزار 7 سو 4 عازمین حج غی ادانگی واسطے روانہ وین گا۔

\*\*\*\*\*

## KV REASI

تعلیم غا شعبہ واسطے ایک اہم پیش رفت مانہ ریاسی قصبہ مانہ پہلا کیندر ودیالیہ گا قیام واسطے زمین غی نشان دہی کر دتی گئی ہے۔ جہڑی ضلع مانہ معیاری مرکز غا زیر انتظام سکولاں توڑی رسائی نانہ بہتر بنان غی جانب ایک اہم قدم ہے۔ اس قدم غو مقامی لوکاں نے خیر مقدم کیو ہے، جس غی ایک لما عرصہ تیں منگ کی جارئی تھی۔ مقامی لوکاں نے کہیو ہے یوہ ادارو نہ صرف مقامی لوکاں نانہ

بہتر تعلیم فراہم کرے گو بلکہ طویل سفر غا بوج نانہہ وی کہٹ کرے غواس سلسلہ مانہہ بولتا وان مقامی لوکاں نے گُج اس طرح کہیو-----

\*\*\*\*\*

## HOUSE COMM JJM

جل جیون مشن غی عمل آوری گو جائیزو لین واسطے بنائی گئی 13 رُکنی ہاؤس کمیٹی نے اج پونچھ ضلع مانہہ بکھ بکھ پانی غی سپلائی بارے سکیمان گو زمینی معائنو کیو۔آکاشوانی جموں گا نمائندہ غے مطابق کمیٹی نے منڈی علاقہ مانہہ کئی پانی غی سکیمان گو جائیزو لیو تانجے ان غی کارکردگی نانہہ دیکھیو جاسکے۔ مقامی لوکاں نے صاف پین غا پانی غی کمی ور سخت ناراضگی ظاہر کی۔انہاں نے دسیو کہ جل جیون مشن غے تحت کئی سکیمان، خاص طور ور لفٹ واٹر سپلائی سکیم،یعنی مشین غے ذریعے سپلائی غی دستیابی ٹھیک طریقہ تیں کم نی کررئی۔ جس غی وجہ تیں لوکاں نانہہ شدید مشکلات غو سامنو کرنو پے رہیو ہے۔ خواتین نے کہیو کہ انہاں نانہہ پانی لیان واسطے دور دور توڑی جانو پے رہیو ہے۔

\*\*\*\*\*

## TAWI RIVERFRONT

جموں شہر مانہہ توی ریور فرنٹ مقامی لوکاں تے سیاحاں واسطے ایک بلچل آلی منزل مانہہ تبدیل ہو گیو ہے۔آکاشوانی جموں غا نامہ نگار نے اطلاع دتی ہے کہ حال ہی مانہہ ختم ہون آلا توی مہوتسو مانہہ 35 ہزار تون زائد زائرین غو زبردست آنو جانو دیکھیو گیو ہے، جہیرو خطہ غی سیاحت تے اقتصادی بحالی غی کوشش مانہہ ایک اہم سنگ میل ہے قابل ذکر ہے جے دریائے توی غا خوبصورت کنڈے ور منعقد ہون آلا اس تہوار نے ثقافت تے سیر سپاٹا گو ایک متحرک امتزاج پیش کیو ہے۔واضع رہ جے متحرک ثقافتی کارکردگی تے روایتی کشتی مقابلہ تون لے غے کھان پین غی اشیاء غا سٹال توڑی دریا فرنٹ برادری غا جزیہ غو مرکز بن گیو ہے قابل ذکر ہے جے اس تقریب غی ایک اہم خصوصیت توی آرتی تھی جس مانہہ ہر شام بڑی تعداد مانہہ لوک آویں تھا۔

\*\*\*\*\*

## RAJOURI PADYATRA

راجوری مانہہ حُکام نے کل نانہہ ہون آلی نشاُمکت جموں کشمیر مہم گا سلسلہ مانہہ پد یاترا غا ہموار انعقاد واسطے وسیع انتظامات کیا ہیں۔ایس۔ایس۔پی ٹریفک دیہی جموں فاروق قیصر نے اج پد یاترا غا پیش نظر ٹریفک انتظامات غا بارہ مانہہ میڈیا نانہہ تفصیلی جانکاری دتی انہاں نے دسیو جے تقریب غے دوران ہموار نقل و حرکت تے عوام غی حفاظت نانہہ یقینی بنان واسطے ٹریفک غا خصوصی ضابطہ بنایا گیا ہیں بڑی گڈیاں نانہہ اہم مقامات بشمول دربالی پُل، کھنڈ لی پُل جہیڑو مہرا چوک در ہے تے پُرانا بس اڈہ مانہہ داخل ہون غی اجازت نی ہوسے۔

\*\*\*\*\*

## HAEMOPHILIA DAY

ضلع پونچھ غا محکمہ صحت نے اج عالمی یوم ہیموفیلیا غا موقع ور ایک آگاہی کیمپ گو انعقاد کیو ، جس غو مقصد لوکاں نانہہ ہیموفیلیا تے دیگر خون بہن آلی بیماریاں غا بارہ مانہہ معلومات فراہم کرنو تھو۔ یوہ پروگرام راجہ سُنکھ دیو سنگھ ضلع اسپتال پونچھ مانہہ منعقد ہوو۔ جت ڈاکٹران تے طبی عملہ نے لوکاں نانہہ اس بیماری غی علامات، بچاؤ تے علاج غا بارہ مانہہ آگاہ کیو۔اس کیمپ مانہہ مریضان ، اُن غا تیمارداران تے مقامی لوکاں نے شرکت کی تے انہاں نانہہ بیماری غی وجوہات ، علامات تے دستیاب علاج غا بارہ مانہہ معلومات دتی۔ اس بارے گل کرتا وان اسپتال غا میڈیکل سپر ٹنڈنٹ، ڈاکٹر شفیق چوہان نے اس طرح کہیو-----

\*\*\*\*\*

## WEATHER

محکمہ موسمیات غے مطابق اج تیں 19 اپریل توڑی موسم جزوی طور ور ابرآلود تیں مکمل طور ور ابرآلود رے غو تے بکھ بکھ مقامات ور رُک رُک غے ہلکی بارش تے گرج چمک غے نال بارش ہو سکے۔ اس دوران گجھ اچا مقامات ور تیز ہوا تے آناس پین غا امکان ہیں۔ تاہم 20 اپریل تیں 24 اپریل توڑی موسم زیادہ تر خشک رے غو۔ حُکام نے لوکاں نانہہ مشورو دتو ہے کہ خراب موسم غے دوران احتیاطی تدابیر اختیار کریں تے خاص طور ور ان علاقان مانہہ ضروری حفاظتی اقدامات کریں، جت تیز ہوا تے آناس غو خطرو ہے۔اس بارے گل کرتا وان محکمہ موسمیات گا ڈائریکٹر مختار احمد نے اس طرح کہیو-----

\*\*\*\*\*

NEWS READ BY NUSRAT  
NEWS READ BY ZAFFAR IQBAL  
NEWS EDITOR KUNAL SHRIVATSA  
DEO NUSRAT  
SKILLED RAJAT  
TECH ASST QUDRAT